



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
ՈՐՈՇՈՒՄ**

----- 2024 թվականի N°--Ա

**ՏԱՎՈՒՇԻ ՄԱՐԶԻ ԴԻԼԻՋԱՆ ՔԱՂԱՔԻ Տ. ՊԵՏՐՈՍՅԱՆ ՓՈՂՈՑ 2, 2/1, 2/2, 4,
4/1, 4/2, 24 և 4-ՐԴ ՆՐԲ. 1 ՀԱՍՑԵՆԵՐԻ ՆՈՐ ՀԱՄԱԿԱՐԳԵՐԸ
ՋՐԱՄԱՏԱԿԱՐԱՐՄԱՆ ԵՎ ՋՐԱՀԵՌԱՅՄԱՆ ՀԱՄԱԿԱՐԳԵՐԻՆ ՄԻԱՑՆԵԼՈՒ
ՄԱՍԻՆ**

Հաշվի առնելով, որ՝

- ա) Կարապետ Օհանյանը (այսուհետ՝ Դիմող անձ) դիմել է Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով)՝ հայտնելով, որ Տավուշի մարզի Դիլիջան քաղաքի Տ. Պետրոսյան փողոց 2, 2/1, 2/2, 4, 4/1, 4/2, 24 և 4-րդ նրբ. 1 հասցեներում գտնվող հողամասերում նախատեսում է կառուցել առանձնատների թաղամաս (այսուհետ՝ Թաղամաս), որի ջրամատակարարման և ջրահեռացման համար «Վեոլիա Ջուր» փակ բաժնետիրական ընկերությունից (այսուհետ՝ Մատակարար) ստացել է տեխնիկական պայմաններ, որով Մատակարարի՝ ջրամատակարարման ու ջրահեռացման համակարգին միացման համար սահմանվել է մեկ կետ: Դիմող անձը հայտնել է, որ հետագա խնդիրներից խուսափելու համար նպատակահարմար է տեխնիկական պայմաններով սահմանել, որ Թաղամասում կառուցվող առանձնատներն ունենան իրենց առանձին միացման կետերը, որպեսզի հետագայում այդ առանձնատների սեփականատերերը հնարավորություն ունենան դառնալ Մատակարարի բաժանորդներ՝ յուրաքանչյուրն իր սահմանազատման կետով,
- բ) Հանձնաժողովի 2016 թվականի նոյեմբերի 30-ի №378Ն որոշման 1-ին կետով սահմանված խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման կանոնները (այսուհետ՝ Կանոններ) չեն նախատեսում մեկ հողամասի վրա առանձին շինությունների համար առանձին սահմանազատման կետեր ունենալու հնարավորությունը, ու նպատակահարմար է այդ մասով կայացնել Հանձնաժողովի անհատական որոշում,

բ) Մատակարարը սույն թվականի ----- և Դիմող անձը սույն թվականի -----
---ի գրություններով հայտնել են, որ չեն առարկում Մատակարարի՝
ջրամատակարարման ու ջրահեռացման համակարգին միացման գործընթացը
սույն որոշմամբ սահմանված ընթացակարգով իրականացնելուն, և

հիմք ընդունելով Կանոնների 23-րդ կետը՝ **Հանձնաժողովը որոշում է.**

1. Սահմանել, որ՝

1) Թաղամասի առանձնատների նոր համակարգերը Մատակարարի
ջրամատակարարման ու ջրահեռացման համակարգին միացման
տրամադրվող (փոփոխվող) տեխնիկական պայմաններում պետք է
նախատեսվեն կառուցվող օբյեկտների համար առանձին միացման կետեր,
իսկ Թաղամասի սնուցումը կկատարվի մեկ միացման կետից:

2) Դիմող անձը Կանոնների 15-րդ կետի 1-ին ենթակետի «գ» պարբերությանը
համապատասխան Մատակարարին ներկայացվող դիմումին կից պետք է
ներկայացնի թաղամասում նախատեսվող օբյեկտների տեղադիրքը ցույց
տվող սխեմատիկ հատակագծի կամ հաստատված գլխավոր հատակագծի
պատճենը:

3) Դիմող անձը Թաղամասի բոլոր օբյեկտների համար նախատեսելու է
կառուցել նոր համակարգ՝ սահմանազատման կետերում նախատեսելով նաև
ջրաչափական հորեր:

4) Թաղամասում առկա օբյեկտներում առևտրային հաշվառքի սարքերը
տեղակայվում են Կանոնների 22.1-ին կետով նախատեսված դիմումները
ստանալուց հետո:

2. Սույն որոշումն ուժի մեջ է մտնում Մատակարարին և Դիմող անձին օրենքով
սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀԻ
ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝**

Ս.ՇԱՀԻՆՅԱՆ